

## DOMINGU XII TEMPUS KOMÚN – TINAN B

### TEMA

Maromak preokupa ho drama sira ema nian? Nia iha ne'ebé iha momentu sira terus no difikuldade nian ne'ebé ita enfrenta iha moris? Liturgia Domingu XII nian hateten mai ita katak ema la lakon, mesak, abandonadu ba ninia sorte; maibé Maromak la'o iha nia sorin, tau matan ba nia ho domin aman nian no oferese ba nia iha pasu ida-idak moris no salvasaun.

*Leitura dahuluk* ko'alia mai ita kona-ba Maromak ida boot no kbiit-na'in, ne'ebé domina natureza no iha planu perfeitu no estável ba mundu. Maski ema tan ninia limitasaun la komprende, nia presiza saran an de'it ba Maromak iha haraik an.

Iha *Evanjellu*, Marcos propoin mai ita katekeze ida kona-ba dixípulu sira nia dalan misaun nian iha mundu... Marcos garante mai ita katak dixípulu sira nunka mesak atu enfrenta tempestade sira ne'ebé loroloron mosu iha tasi moris nian... Dixípulu sira la presiza ta'uk, tanba Kristu la'o ho sira, tulun sira manán opozisaun forsa sira-nian ne'ebé opoin ba moris no salvasaun.

*Leitura daruak* garante katak ita-nia Maromak mak Maromak ne'ebé la indiferente. Ho Jezús ne'ebé mai iha mundu atu liberta ita husi egoísmu ne'ebé halo ita sai husi moris-atan no atu propoin mai ita liberdade domin nian.

### LEITURA I – Job 38,1.8-11

Livru Job nian mak klásiku literatura universál, la'ós de'it ba ninia beleza extraordinária, maibé mós ba kestaun sira ne'ebé aborda no kona núkleu ezisténsia umana nian. Istória serve nu'udar pretestu atu reflète kona-ba tema fundamentál sira kona-ba ema ne'ebé nafatin interroga an, kestaun sira ema justu inosente nia terus, ema nia situasaun iha Maromak nia oin no Maromak nia atitude iha ema nia oin.

Nia apresenta mai ita istória kona-ba mane di'ak no justu ida (Job), ne'ebé derepente desgrasa kona nia hodi lakon nia rikusoin hotu, nia família no saude rask. Iha livru nia parte sentrá (kf. Job 3,1-37,24), Job husu kona-ba nia terus nia hun no Maromak nia papél iha ninia drama pesoál. Job nia belun ruma buka hatán ba ninia kestaun sira, hodi apresenta esplikasaun sira ne'ebé teolojia ofisiál fó: terus mak nafatin rezultadu husi ema nia salan, se Job terus, ne'e tanba nia halo salan... Job rekuza ho forsa tomak konkluziun simplista sira ne'e, tanba ninia konxiénsia hakmatek no demonstra doutrina ofisiál ninia falénsia atu esplika ninia drama pesoál. Ho sentidu krítiku, Job desmonta dogma fundamentál sira Israel nia fiar nian no rekuza Maromak “kontabilista” ne'ebé limita An atu rejistra ema nia hahalok di'ak no aat atu selu tuir. Maromak la'ós buat ne'e; no Job nia kazu konkretu mak prova ida.

Rejeita tiha esplikasaun tradisionál ba drama terus nian, Job diriye direktamente ba Nia ne'ebé bele fó resposta sira: Maromak rasik. Iha ninia diskursu, krítiku liu, ita haree kruza laran-hirus, violénsia, keixa sira, inkonformizmu, dúvida, revolta, ho esperansa, fiar no konfiansa iha Maromak. Bainhira, finalmente, Maromak enfrenta Job, Nia fó hanoin ba Job nia fatin kriatura nian, ho limitasaun no finitu/mate nian; Maromak hatudu katak nia de'it mak koñese lei sira ne'ebé ukun universu no vida, hatudu ba nia preokupasaun no domin ba kriatura ida-idak; Maromak konvida nia atu keta foti an, atu okupa nia fatin kriatura nian no atu la kuestiona Maromak nia planu ba mundu, tanba planu eh Maromak nia hanoin no lójika ultrapasa kriatura hotu nia kapasidade komprensaun no entendimentu nian.

Istória remata ho Job ne'ebé komprende nia fatin, rekoñese Maromak nia tranxendénsia no oinsá susar atu komprende ninia projetu sira, entrega an iha Maromak nia liman ho haraik an no konfiansa.

Testu ne'ebé propoin mai ita halo parte diskursu ida ne'ebé Maromak uza atu hatán ba Job (kf. Job 38,1-40,2). Iha diskursu ne'e, Maromak tau pergunta lubuk ida ba Job kona-ba rai, tasi, mistériu boboot natureza no vida nian; nia finalidade la'ós atu hetan resposta husi Job, maibé atu halo nia komprende ninia limite sira, ninia ignoránsia, ninia inkapasidade atu entende Maromak nia mistériu no projetu sira ba mundu no ba ema sira.

### *MENSAJEN*

Testu hahú hodi apresenta Jahwéh hatán ba Job “iha tempestade nia klaran” (vers. 1). Ne'e mak kuadru abituál teofania sira-nian (kf. Ex 19,16); serve atu enkuadra Maromak kbiit-na'in nia manifestasaun ba ema sira.

Jahwéh manifesta an ba Job; nia objetivu mak hatán ba Job nia kestaun sira no halo Job komprende katak nia krítika sira mak ema beik ida nian. Apresenta An tiha nu'udar arkitetu boot ne'ebé harii rai (kf. Job 38,4-7), Jahwéh refere ba ninia papél atu kontrola tasi (vers. 8 no 10).

Katekista Israel nian hanorin katak Jahwéh mak ukun tasi, la'ós maromak Mesopotámia nian naran Marduk, hanesan haktuir iha mitu/lenda sira. Jahwéh la presiza luta maka'as, hanesan Marduk, maromak mitu Mesopotámia nian; Maromak ho nia kbiit nia organiza mundu hodi impoin bee sira, impoin limite ida ne'ebé sira labele hakat liu orden divina. Maromak iha domíniu perfeitu iha kriasaun tomak.

Hodi fó hanoin Job ba Ninia asaun hodi ukun tasi, Jahwéh apresenta An, uluknanai, nu'udar ida-ne'ebé aas liu iha ninia tranxendénsia no majestade; no tuirmai hatudu katak, Nia iha planu estavel ida, tasak, konsolidadu... Sé mak Job atu kuestiona Maromak kriador nia hanoin, ne'ebé ho nia Liafuan kontrola tasi? Job hetan konvite atu aseita katak Maromak ida iha-ne'ebé kriasaun tomak depende ba Nia, iha-ne'ebé tasi mós hakruuk ba Nia, Ida ne'ebé kuida kriasaun ho kuidadu aman nian, hatene saida mak Nia halo no iha solusaun ba ema sira nia problema no drama sira... Ema, iha ninia situasaun kriatura finita no limitada, mak dalabarak la konsege haree no komprende sentidu ikus Maromak nia projetu sira-nian.

Nu'udar konkluzau: Maromak de'it mak iha resposta sira; ema presiza de'it rekoñese nia limite kriatura nian no saran an iha Maromak kbiit-na'in no aas liu nia liman, ne'ebé iha projetu ida ba mundu. Ema presiza de'it konfia iha Maromak , ninia esperansa no salvasaun.

## **LEITURA II – 2 Cor 5,14-17**

Surat Dahuluk ba Corinto oan sira (ne'ebé kritika membru balun comunidade nian tan sira-nia atitude la tuir valór sarani) provoka reasaun maka'as no kampaña ida atu hafoer Paulo nia naran. Kampaña ne'e parese misionáriu itinerante sira husi comunidade sarani Palestina nian mak organiza, basá sira konsidera sira-nia an nu'udar representante loos Apóstolu Sanulus-resin-rua nian no minimiza Paulo nia serbisu apostóliku (sira afirma katak Paulo inferiór ba apóstolu sira seluk, tanba nia la konvive ho Jezús enkuantu Nia la'o iha Palestina ho ninia eskolante sira). Paulo, simu tiha informasaun kona-ba buat ne'e hotu, dirije lalais kedas ba Corinto no hasoru konfrontu violentu ho ninia inimigu sira. Hafoin, nia retira an ba Éfeso. Tito, Paulo nia belun, negociador delikadu no diplomata matenek, bá Corinto, atu tenta rekonsiliaun.

Paulo fali, bá tiha Tróade. Iha-ne'ebá mak nia hasoru fali Tito, ne'ebé fila husi Corinto. Notísia sira husiTito fó korajen: sira-nia diferensa ultrapasa ona no Corinto oan sira, fila fali ba komuñiaun ho Paulo.

Simu tiha konsolasaun ne'e, Paulo hakerek apolojia ho hakmatek atu defende ninia apostoladu, no hamutuk nia halo mós apelu atu halo kolekta/oferta ida ba kiak sira Kreda Jerusalém nian. Testu ida-ne'e mak mak ita-nia Surat Daruak ba sarani sira iha Corinto. Ita iha tinan 56/57.

Testu ne'ebé ohin propoin mai ita integra parte dahuluk Surat nian, iha-ne'ebé Paulo analiza ninia relasaun sira ho comunidade Corinto nian no esplika prinsípiu sira ne'ebé gia nafatin ninia asaun pastorál (kf. 2 Cor 1,3-7,16).

## *MENSAJEN*

Sá loos mak “movimenta’ Paulo? Sá loos razaun ba ninia ministériu? Tanba sá mak Paulo – ne'ebé la koñese Jezús istóriku, hanesna sira na'in Sanulu-resin-rua – insiste atu haklaken Nia? Keta Paulo hakat liu nia funsaun sira?

Paulo halo esperiénsia kona-ba Kristu nia domin no nia husik domin ne'e absorve nia. Ninia asaun apostólíka iha objetivu ida de'it katak halo ema hotu koñese Kristu nia domin. Kristu mate ba ema hotu, atu ema hotu aprende lisaun domin nian to'o konsekuensi ikus, no abandona sira nia moris tuan egoíзму no salan nian. Hodi kontempla Kristu ne'ebé ofere nia moris ba Aman no maluk sira, ema sira labele tan ona moris iha taka an, maibé nakloke ba Maromak no ema seluk (vers. 14-15). Ne'e mak “liafoun di'ak” ne'ebé absorve Paulo kompletamente no nia hakarak hatutan ba nia maluk sira.

Paulo admite katak, iha tempu uluk nia komprende Kristu “hanesan ema” no la haree ninia saran an to'o mate nu'udar espresaun domin lahó limite; maibé, depoizde hasoru Kristu moris-hi'as iha lurón Damasco nian, Paulo haree oinseluk ona (vers. 16).

Paulo hakarak haklaken – ho Kristu nia mandatu – katak adezaun ba Kristu halakon ema tuan egoíзму no salan nian no hamosu kriatura foun (vers. 17). Liafuan gregu Paulo uza (“ktisis”) bele signifika “kriasaun”, “kriatura” eh “umanidade”... Sarani ida ne'ebé adere ba Kristu, mak kriatura foun ida, membru umanidade foun. Hodi identifika an ho Kristu, nia halai ba hasoru Ema Foun, moris nakonu no loos, salvaun definitiva.

Ida-ne'e mak halo Paulo “halai” bá hasoru... Nia experimeta Kristu nia domin no sai kriatura foun. Agora, nia sente katak Maromak haruka nia fó sasin esperiénsia ne'e iha ema hotu nia oin.

## **EVANJELLU – Mc 4,35-41**

Iha parte dahuluk Evanjellu nu'udar Marcos haktuir (kf. Mc 1,14-8,30), nia apresenta Jezús nu'udar Mesias ne'ebé haklaken Maromak nia Reinu. Marcos buka haudu oinsá Jezús, ho liafuan no jestu sira, haklaken mundu foun ida ( “Maromak nia reinu”), livre husi egoíзму, opresaun, injustisa no buat hotu ne'ebé halo ema sai atan no impede atu iha asesu ba moris loos. Tetsu ohin nian integra iha ambiente ne'e.

Ita-nia testu hahú ho indikasaun katak Jezús deside hakat ba sorin balu”. “Sorin balu” (tasi Tiberíades nian) mak territóriu jentiu sira Decápole nian. Decápole (“sidade sanulu”) iha territóriu Palestina orientál, abranje Damasco iha tasi-feto/ norte no, Filadélfia, iha tasi-mane. Naran ne'e serve atu indika liga sidade sanulu, ne'ebé forma depoizde Roma konkista Palestina, iha tinan 63 mK. “Sidade sanulu” ne'ebé forma liga mak sidade elenista no la

hakruuk ba lei judaika. Sira hela iha administrasaun romana iha Síria nia okos. Nu'udar territóriu pagaun, judeu sira konsidera nu'udar dook husi salvasaun.

Epizódiu Marcos haktuir iha domingu ne'e, akontese iha pasajen ida iha Bee-lihun Tiberíades eh ema hanaran "Tasi Gaileia" nian. Loloos bee-lihun ida ne'ebé simu bee husi mota Jordão, ho luan kilométru 12 no naruk kilométru 21. Tempestade sira iha "tasi" ne'e bele mosu tekir-tekir no baibain violentu liu.

Atu komprende di'ak epizódiu ohin nian, presiza hanoin ba leitura dahuluk kona-ba signifikadu "tasi" nian ba mentalidade judaika: tasi mak realidade ida ne'ebé hamta'uk, labele hamaus, foti-an, la iha orden, iha laran moris kbiit kaos nian ne'ebé ema labele kontrola no kbiit aat nian ne'ebé hakarak harahun ema sira... Maromak de'it mak ho nia kbiit no ukun bele tau limite ba tasi, fó orden no liberta ema husi forsa kaos tasi nian.

Narrasaun Marcos nian mak pájina ida katekeze nian. Hodi uza elementu sira ho karga simbólika forte (tasi, roo, tempestade, kalan, Jezús nia toba-dukur), Marcos apresenta mai ita reflesaun ida kona-ba comunidade dixípulu sira-nian iha marxa istória nian. Marcos hakerek iha tempu ida iha-ne'ebé Jezús nia Kreda enfrenta "tempestade" oioin (persegisaun husi Nero, problema internu tan diferenza perspetiva nian entre judeu-kristaun no paganu-kristaun, difikuldade ne'ebé comunidade presiza hetan dalan ba futuru...); no hakarak fó sujestaun ba fiar-na'in sira kona-ba dalan atu tuir.

## *MENSAJEN*

Uluknanai, "ambiente" Marcos tau ita bá mak: tasi, rai nakukun (vers. 35). Tau roo ho Jezús nia dixípulu sira "iha tasi" katak, koloka sira iha ambiente inimigu, perigozu, kaótiku, nakonu ho forsa ne'ebé luta kontra Maromak no kontra ema nia ksolok. Hus sorin seluk, "kalan" mak tempu buat nakukun nian, la iha roman; elementu ne'e liga ho ta'uk, dezánimu, falta perspetiva sira. "Tasi" no "kalan" define realidade ida difikuldade nian, ostilidade nian, inkomprensuan nian.

Iha "roo" iha Jezús no dixípulu sira (vers. 36). "Roo" iha katekeze kristán mak, símbolu comunidade Jezús nian ne'ebé navega/la'o iha istória. Jezús iha "roo" laran, maibé dixípulu sira mak enkarregadu navegasaun nian, basá sira mak simu knaar atu lori comunidade iha tasi moris nian.

"Roo" dirije bá "sorin seluk" (vers. 35b), bá hasoru rai ema jentiu sira-nian. Ho faktu ne'e Marcos indika comunidade sarani nia misaun, ne'ebé hetan konvite husi Jezús atu bá hasoru ema hotu nune'e lori Jezús ba sira no ninia proposta libertadora.

Durante sira-nia viajen, Jezús "toba" (vers. 38). Jezús nia "toba-dukur" durante viajen parese refere ba ninia auzénsia (aparente) iha "viajen" ne'ebé comunidade sarani halo iha istória. Dalabarak dixípulu sira, okupadu atu dirije "roo", sente katak sira mesak, abandonadu ba sira-nia sorte no katak Jezús la hamutuk ho sira atu enfrenta lala'ok/situasaun sira viajen nian. Loloos, Jezús hamutuk ho sira iha "roo" laran; Nia promete atu horik ho sira "to'o mundu nia rohan".

"Tempestade" /anin-boot (vers. 37) signifika difikuldade sira ne'ebé mundu opoin ba dixípulu sira nia misaun. Bele mós refere ba "tempestade" konkreta, hanesan Nero nia persegisaun ba sarani sira Roma nian, iha-ne'e oho tiha Pedro no Paulo, nune'e mós sarani sira seluk (tinan 64-68. Marcos nia Evanjellu mosu iha momentu ne'e); maibé "tempestade" refere mós ba momentu sira krize nian, persegisaun nian, ostilidade nian ne'ebé dixípulu sira sei enfrenta iha nia dalan istóriu, to'o mundu nia rohan.

Jezús, ne'ebé dixípulu sira fanun, halo tasi siak no anin boot hakmatek, ho nia Liafuan ne'ebé iha kbiit maka'as (vers. 39). Jezús mak Maromak ne'ebé iha kbiit atu domina tasi no forsa inimigu nian; Nia mak Maromak ne'ebé akompaña dixípulu sira nia dalan difisl iha mundu no tau matan ba sira iha difikuldade no susar sira nia leet.

Halo tasi no anin hakmatek tiha, Jezús dirije ba dixípulu sira no haksiak sira kona-ba sira-nia falta fiar nian (vers. 40: “tanba sá mak imi hakfodak? Imi seidauk fiar?”). Dixípulu sira, la’o tiha ho Nia iha mundu, loloos tenke hatene ona katak Jezús la auzente no la dook husi komunidadade nia moris. Sira labele haluha katak, iha situasaun hotu, Jezús la’o ho sira iha “roo” hanesan, tanba ne’e, lalika ta’uk buat ida. Jezús nia komunidadade tenke konxiente katak Nia nafatin prezente, nune’e, tempestade sira istória nian labele impede sira atu konkretiza iha mundu misaun ne’ebé entrega ba sira.

Ita-nia testu remata ho dixípulu sira-nia “hamta’uk” no pergunta ne’ebé sira halo ba malu: “Sé mak ema ne’e, mak anin no tasi mós obedese nia?” (vers. 41). “Hamta’uk” define estadu espíritu ema nian iha Maromak nia oin. Iha universu bíbliku, “hamta’uk” la apresenta karáktek pániku nian eh atan ida nia ta’uk ba nia na’in, maibé iha nia ita hetan kbiit misteriozu ida atrasaun nian ne’ebé tradús iha obediénsia, entrega, konfiansa, entuziazmu. Atitude pozitiva ne’e mai husi esperiénsia fiar-na’in relijiozu ida-nian iha Maromak: Jahwéh mak Maromak prezente, ne’ebé gia nia Povu ho atensaun aman no inan nian. Tanba ne’e, fiar-na’in ida, maski iha parte ida nia iha konxiénsia kona-ba Maromak nia kbiit, husi parte seluk nia bele konfia iha Nia ho modu inkondisionál no entrega nia an iha Nia liman. “Hamta’uk” dixípulu sira-nian signifika katak sira rekoñese katak Jezús mak Maromak iha ema sira nia leet, no ema sira simu konvite atu adere ba Nia, konfia iha Nia, obedese Nia ho entrega totál.